

28/08/1999

PM setuju tubuh universiti di Kelantan

KOTA BHARU, Jumaat - Datuk Seri Dr Mahathir Mohamad bersetuju menubuhkan sebuah universiti berteraskan sains dan teknologi di Kelantan jika Barisan Nasional (BN) berjaya menawan kembali negeri itu dalam pilihan raya umum akan datang.

Pengerusi Badan Perhubungan Umno Kelantan, Tengku Razaleigh Hamzah, berkata beliau sudah menemui Perdana Menteri beberapa hari lalu bagi membincangkan perkara itu dan Dr Mahathir bersetuju supaya agenda berkenaan dimuatkan dalam manifesto khas BN di Kelantan.

"Selain manifesto BN yang akan dikeluarkan oleh ibu pejabat Umno, kita juga membentuk manifesto khas bagi perjuangan di Kelantan. Antara yang difikir layak dimuatkan di dalamnya ialah penubuhan sebuah universiti di negeri ini.

"Rakyat Kelantan memang sudah lama menunggu penubuhan universiti di negeri ini tetapi ia terpaksa ditangguhkan kerana perubahan kerajaan dan tidak mendapat kerjasama kerajaan negeri.

"Dengan persetujuan Perdana Menteri, saya beranikan diri untuk maklumkan bahawa kalau BN memenangi pilihan raya umum akan datang, kita akan tubuhkan Universiti Sains dan Teknologi yang mirip kepada perkembangan teknologi maklumat," katanya selepas majlis ceramah di Cabang Empat Kampung Bayam di sini, malam tadi.

Tengku Razaleigh berkata, beliau sudah menemui profesor dan pensyarah dari beberapa institusi pengajian tinggi (IPT) yang diberi tanggungjawab menyediakan kertas kerja berhubung cadangan membina universiti di Kelantan.

Beliau berkata, golongan terbabit mencadangkan universiti itu memulakan pengambilan pelajar seawal tahun 2000 bagi menampung kebanjiran mahasiswa.

"Saya terkejut apabila dimaklumkan bahawa kira-kira 40 peratus daripada jumlah keseluruhan mahasiswa Bumiputera di IPT tempatan adalah dari Kelantan manakala hampir 20 peratus pensyarahnya juga berasal dari negeri ini," katanya.

(END)